



h

Stradali dok su nosili hranu životinjama: U Zavidovićima ubijen ef. Admir Vuković, ranjen njegov zet

Objavljeno: 28.06.2017. u 15:24

Admir ef. Vuković , tridesetšestogodišnjak iz Zavidovića, koji je živio u Mokronogama, gdje je i vodio tamnošnji džemat, muškarac je koji je ubijen sinoć tokom krivolova u mjestu Stoga u Zavidovićima. Njegov zet Mesud Krajinić u pucnjavi je ranjen.

Tragedija se dogodila sinoć oko 21.30 sati, a kako smo saznali od poznanika preminulog efendije, Vuković i Krajinić, koji su lovci, na spomenutom lokalitetu su u to vrijeme nosili žito u hranilice životinja.

Zvao porodicu

S druge strane, u krivolovu su bili otac i sin P. H. i E.H. te im se, u trenutku dok su muškarci prolazili u njihovoj blizini noseći hranu, učinilo da vide divljač.

Odmah su zapucali prema njima. Vuković je ostao mrtav na mjestu, dok je njegov zet zadobio nekoliko povreda. Srećom, povrede nisu bile teške, pa je Krajinić zadržao prisebnost i odmah telefonom pozvao porodicu kojoj je kratko kazao da je ranjen.

Ubrzo je transportovan u lokalni dom zdravlja gdje mu je najprije ukazana pomoć.

VEZANI TEKST - Drama u Zavidovićima: Otac i sin jednog muškarca ubili, drugog teško ranili

Dežurna ekipa ljekara policiju je potom obavijestila da je u ovu ustanovu dovezena jedna osoba sa povredama nanesenim vatrenim oružjem, a Krajinić je transportovan u Kantonalnu bolnicu u Zenicu. Policija je odmah izašla na teren, a otac i sin osumnjičeni za ubistvo i ranjavanje su uhapšeni.

Krajinić je nakon zbrinjavanja otpušten iz zeničke bolnice, s obzirom na to da su mu konstatovane lakše tjelesne povrede.

- Pacijent je u bolnicu dovezen u 22.20 sati zbog povreda leđa, lica i lijeve nadlaktice nastalih usljed djelovanja vatrene oružja. Konstatovano je da se radi o lakim povredama. Pacijent je ipak opserviran neko vrijeme pa na kraju i pušten na kućno liječenje – kazala je za Faktor Aida Buro, glasnogovornica Kantonalne bolnice u Zenici.

Ubice u Tužilaštvu

Uviđaj na mjestu događaja još traje, a obavljaju ga pripadnici MUP-a pod rukovodstvom dežurnog kantonalnog tužioca.

Kako saznajemo, tužilac je već naložio obdukciju tijela preminulog. Međutim, prikupljanje dokaza je još u toku. Uhapšeni će danas biti predati nadležnom Tužilaštvu.

- Otac i sin su uhapšeni i danas će biti predati u nadležnost Kantonalnog tužilaštva na daljnje postupanje uz izvještaj o počinjenim krivičnim djelima ubistvo i lake tjelesne povrede. Dežurni tužilac će nakon zaprimanja izvještaja i ispitivanja osumnjičenih odlučiti o upućivanju prijedloga za pritvor. Naložena je obdukcija, koja će biti obavljena u Tuzli - kazala nam je glasnogovornica Tužilaštva ZDK Naila Muratović.

Iz MUP-a ZDK saopćeno je i da je uhapšen i F.H. (26) zbog sumnje da ima veze sa cijelim slučajem.

Admir ef. Vuković je rođen u Zavidovićima, završio je Elči Ibrahim-pašinu medresu u Travniku, magistrirao u Welsu i nakon toga se zaposlio kao imam u džematu Mokronozi u Medžlisu Islamske zajednice Tomislavgrad.

Kako saznajemo, iza ubijenog Vukovića ostala je porodica, supruga i dvoje djece.

Faktor pratite putem aplikacija za **Android**. Pratite nas i na društvenim mrežama **Facebook** i **Twitter**. Zabranjeno je prenošenje sadržaja bez odobrenja redakcije. Kontaktirajte nas na **redakcija@faktor.ba**.



KONTAKT IMPRESSUM MARKETING UVJETI KORIŠTENJA JAVI FAKTORU SADRŽAJ

Redakcija
redakcija@faktor.ba
+387 33 944 398
+387 33 944 392
Marketing služba
marketing@simurgmedia.ba
+387 33 944 206
+387 33 944 207

Sva prava pridržava Simurg media d.o.o. ©2021
Simurg media d.o.o.; Zmaja od Bosne 88, 71000 Sarajevo, BiH, info@simurgmedia.ba, +387 33 942 660